

Hamid Jelačić - Mido, geometar



Dana 16.06.2017. godine iznenada i zauvijek nas je napustio i na drugi svijet preselio naš dragi kolega, prijatelj i drug Jelačić Hamid zvani Mido.

Rahmetli Hamid Jelačić, rođen je u Sarajevu 15.02.1951. godine. U rodnom gradu Mido završava osnovnu školu, a 1969. godine završava i Srednju geodetsku tehničku školu također u Sarajevu i stiče zvanje geodetskog tehničara.

Godine 1976. Mido se oženio suprugom Jasminom sa kojom je 1980. godine dobio sina Ismira. Nakon teške bolesti 1995. godine supruga Jasmina je umrla. Suprugu nikada nije prežalio, a ostatak svog života proveo je sa sinom Ismirom kome se u potpunosti posvetio.

Bogat profesionalni angažman Mido počinje svojim prvim zaposlenjem 1972. godine u Republičkom hidrometeorološkom zavodu – Sarajevo, gdje ostaje zaposlen do 1975. godine, a nakon toga, 1975. godine započinje svoj angažmanu u Geodetskom zavodu u Sarajevu, gdje počinje najvažniji dio njegovog radnog angažmana. Za vrijeme njegovog radnog angažmana u Geodetskom zavodu u Sarajevu, Mido je radio na poslovima inženjerske geodezije i kartografije gdje je ostavio upečatljiv trag. Geodetski zavod napušta 2008. godine, a ostatak radnog angažmana Mido je proveo u firmi Angermeier doo Sarajevo odakle odlazi u zasluženu penziju 2012. godine. U penzionerskim danima sve do smrti Mido je radio kao saradnik i konsultant u firmi BNpro doo Sarajevo.

Nadaleko je čuven njegov profesionalan odnos prema poslu gdje god da je radio i njegov ljudski odnos prema kolegama i svima koje je poznavao. I danas u društvu kolega Mido i njegova ljudskost i stručnost neizostavna su tema, a njegovi radovi služe kao ogledni primjeri. Iako ga život nije štedio, Mido se nikad nije žalio, nego je sve prepreke i nedaće podnosio stoički i borio se sa njima. Najveća životna satisfakcija bilo mu je rođenje unuka Demian, koji je upotpunio njegov život.

Mirnes Bojić